



石研齋集卷六

漫興四首

江都 秦 黌 西 壩



天風吹袖拂虹霓
露洗銀河萬象低
孤嶼遠盤聞喚
鶴中宵起舞聽荒雞
高樓南向人偏北
浩水東流月正西
刻意吟懷憑綺語
新詞譜就總無題
那許芳心臭味同
江干稠疊怨蘭叢
一斑窺豹還迷霧
百怪燃犀早燭空
可信忘機師抱甕
尚知有楚笑遺弓
底須得失豪芒重
萬事驚濤夢雨中

峰散奇雲綺散霞
三年幻影洞庭涯
守心已縛深林虎
持戒難除睡室蛇
夏屋半依新漲水
秋河漫憶舊

乘槎俸錢今日供甘旨久學坡公製畫義
分明黑白一枰棋莫向人間泣路岐車碍方輪難遽
轉馬工行步定然遲不留纖翳雲空日獨倚層樓月
照時底事濃情拋不得春風吹墮鬢絲絲

留別楚中僚友

天恩豈許漫勾留別緒空教戀舊游長袖未能工楚
舞短轅應合駕吳牛鱸魚秋思終慚翰黍谷春回不
待鄒載得故人雲誼重東風吹上木蘭舟

途次聞六弟選授寧海丞却寄

薄祿能酬養一官汝豈輕如何膺職守慎勿玷家聲
浙水繁華地湘雲寄托情蒼茫增百感獨客轉屏營

阻風

浮豚挾雨走奔瀧駭浪停橈悶倚窗遠棹已隨鷗慮
澹峭帆偏爲石尤降野依沙岸連雲濶靜聽波聲徹
夜淙一枕離懷拋不得好吹香夢入蘭江

澧州
驛名

舟行書事三首

出門風雨辰十日苦八九水漲舟頻移繫纜常不守
江帶雨絲寒陰生雲氣厚骨瘁冷不支頽然如老叟
王粲慣離家邠原仍斷酒默坐息塵懷一編時在手
八風至以時厥功當順布胡爲春夏交日與北風遇
凌晨浪猶平習習寒颶度無端朔吹驕掀騰遏雲霧
兩岍各千尺一葉波心住僮僕面相覷舟師手無措

天意不可窺敬以俟天怒
積雨失昏曉睡足江上航披衣快霽色啓牖延晨光
片帆風未飽已如驚鴻翔近浥林花潤遠看鶯燕忙
連宵悵冥晦尺咫不敢望一夕天宇朗郵籤百里長
通塞苟齊視欣戚兩相忘

春江花月夜

江月戀花花戀春春江照月月照人月當江上倍清
迥花逢月下還精神一江新漲坐遙夜花月非主我
非賓江潮初生江月迤滅燭開窗清景瀉三春能得
幾宵閒扁舟江上花月下舉酒酌月仍酌花天涯遊
子暫浮家家中有花亦有月乏此江光瀲灩賒江光

瀲灩江聲咽人間未免重離別花開花謝原有根月
缺月圓影不滅我將春月載春江采得花香葉葉雙
舉頭明月共千里夜夜江頭倒玉缸

大隄曲

襄水城邊路人家隄上住郎住大隄西日日歌唱白
銅鞮妾住大隄東年年楊柳搖春風春風飛花幾千
尺柳綿吹白桃笑紅紅者灼灼白蓬蓬花高花下迷
深叢前年送郎江之澚隄上春期花半吐青青柳眼
不依人幾宵淚落如紅雨去年江上望郎歸三春花
色何歲蕤柳枝半黃桃枝翠枝枝不挽遊人轡隄上
春雲薄隄下春波廓千帆送盡有情儂紫燕雙飛入

羅幕大隄一片可憐春雨雨風風愁殺人雨隨桃浪
蹙風折柳枝禿今年春歸歸更速蕩子天涯去不歸
悔教花艷驚郎目大隄女兒同一哭隄上行人空刺
促爲君歌作大隄曲

襄陽道中四首

風光澹沲入吟髭返景頽波夕權遲十五女兒能盪
槳臨風愁絕瘦腰支

輕燕隨風振遠翰楚天無際水雲寬欲憑雙羽傳消
息昨夜家書寫未完

垂柳橋邊紫碧絮賣花聲裏度紅腔相將攪得愁如
海鏡影新添雪鬢雙

宜春九醞強擎杯歡伯難教笑口開三里孤城迷望
眼濕雲疎雨杜康臺

新野道中

久雨漬卑塗積潦漲紛冗三尺泥淤深坐令官路壅
膩如漆入膠濁似乳餘漣滑滑濺襟鞵沾沾迷龍茸
轍亂無恒趨馬沒深及踵傾陷忽盤渦欹斜依壞壘
前覆後車危左脫右軸聳登頓腸胃翻跣跋心膽悚
縈紆繞修途踐踏忍嘉種時則舍而徒抑或立且拱
未及百里程已賈三日勇驚棹曩迢遙客心多怖恐
更從平陸行且喜高車擁那知跬步艱較勝風濤洶
我馬已虺隤爾輻更臃腫雨意且沈沈遙情倍詢詢

乃信天宇晴足爲行旅重矯首眇漢霄葵心向日捧

寓館題壁

襄城道中

倦策渺修衢憩館峙芳甸入轉軒戶幽坐親几榻便
高樹羅靜陰低英綴葱蒨枝枝婪尾春綽約當人面
素壁橫吟箋繞屋讀彌戀駕言入豫郊偃息暢深院
茲地亦無多位置倍妥善即此悟心精佳構在研鍊
夜雨聲微喧朝花色更絢洗滌愜潛踪經營契遐眷
行行豈滯留一夕謝梁燕

澧陽

瓶水青雲去不還仙洲凝佇渺煙鬟九江東注歸重
險疊嶂西來控百蠻照字有囊師武子校書無地覓

文山

車武子囊螢績學校書郎李羣玉字文山皆澧人也

澧蘭可要遺余佩香草何緣

空谷慳

襄陽

百年魂魄呼誰應太息功勳幾廢興但令穹碑能墮
淚底期深谷便爲陵池邊倒蟻憐山簡臺上呼鷹笑
景升獨有鹿門招隱處高松疊翠石峻嶒

南陽

山接嵩高水接襄崇墉屹立古南陽一條浪湧河流
白清水一名白河西流入襄百劫灰餘戰壘黃逐鹿漫成天下計卧龍
誰道布衣狂中興事業三分策漢祚綿延賴此疆

寄內

四月二十日

團團無限意俯仰仗君身白髮扶持力青燈課讀辛
今宵宜斗酒小別已三旬不斷相思夢何當設悅辰

滎澤渡河放歌

黃河之水九曲盤破天萬里恣奔湍滎澤城邊古渡
口無風百尺生波瀾噫氣三日天風寒砰訇蕩潏河
倒翻黃沙蔽空黑鳶叫行人斷渡興長歎今晨風定
扣飛舫舉頭空濶凌蒼煙羊角漸起颿脚懸中流萬
頃心茫然下有濁浪不測之深淵上有青空不斷之
高天低昂萬象互虧蔽人物千秋幾變遷成皋以東
春陵北汴梁之水伊闕山莽蒼無復王氣在長波一
逝何時還太室少室相鈎連三十六峯渺煙鬟伊洛

瀍澗源流古迢遞莫辨水彎環天風冉冉凌天壇崇
臺玉闕羅青巒仰睇黃鵠不我顧道逢青鳥驂紫鸞
招我閭風前贈我珊瑚鞭東遊良岳西王屋左揖浮
邱右緱仙依稀釣樂清管絃丹花翠實朱琅玕中有
仙人歡長年下視大河南北如彈丸便欲乘風破浪
窮河源攬身直上崑崙巔崑崙不可攀昂首白雲端
當風獨立思漫漫玉皇舊吏緣豈慳但見千帆落前
川馬鳴蕭蕭車班班回頭一笑揮鞭去奚爲坐此瑟
縮凋朱顏

湯陰謁岳忠武祠

奇勲與奇冤童孺皆知矣平生忠義心鑒此大河水

魂兮其歸來恭敬必桑梓廟寢協崇儀水木追本始
一門子若孫并列九公祀歸然肅拜瞻靈風吹尺咫
濺血嵇侍中蒙難古羨里一邑三不朽萬古炳青史

縣有羨里城浣衣村即晉
嵇紹以身捍惠帝濺血處

大風行

庚寅四月二十八沙河北向邢臺發動地狂飈擘面
來土囊崩裂大木拔天風吹沙沙蔽天白日元穹入
恍惚號叫已喧兩耳聾倉卒直疑雙目瞎頓使覲面
失人語坐令咫尺迷城闕銀礫驚飛刮肌膚黃塵蓬
勃堆毛髮籃輿張風風力強自午迄酉勢未歇蓬茅
亂捲屋瓦翻婦子嘻嘻機軋軋嗟我三載離幽燕少

見多怪空艤輒南天多雨北多風氣機高下那可遏
鬱積噴薄會有時豈緣風伯逞狡猾明朝風定沙自
平無事空中書咄咄

雜詠四首

千年鍊五石自言是安期三日瑯琊語一夕飈車馳
報以赤玉鳥期之蓬山陞蓬山那可到樓船渺不歸
東海賣藥者恍惚是耶非海戰成幻想連弩射何爲
不見金明草安得養神芝祖洲秘藥物空立阜鄉祠
虛白遇崔婆有井乃不朽子先呼酒姬兩兩騎茅狗
竊怪逸翮仙愛樓兼愛酒螭駕凌太清乘煙一回首
東風遲潛潁西陸凋衰柳灼灼薜華榮安知松柏壽

與爲列八珍毋寧飲一斗雲梯不可登蹇修以自守
叔達何超超甌破掉臂走小物誠足輕即此識去就
所愧鄧竟陵解官何更瘦尺澤促遊鱗深窞憐困獸
人事足波瀾浮生幾宵晝不如乘紫鸞高挹浮邱袖
直木不爲輪曲木不爲桷用勿枉其才壯行資幼學
汲黯願省郎吳質思帷幄要緣意趣殊非惟識見卓
蒼然萬象閒世路何境垵我欲拂衣去真形圖五嶽
述懷次沈太守業富韻却寄

心跡甘同岩壑儔飄蓬何事強悲秋靜看世態多兒
戲歸戀庭闈信老謀澤有芷蘭渾是夢裝無惹苾可
寬憂江千尺尺離懷阻白紵青山入夢游

題孫壽田

恪

倣劉松年仙山樓閣圖

閬風千尺撐高空玉樓十二紆彩虹丹房翠閣蕊珠
宮面面鑱以青芙蓉芙蓉返照飛霞紅下映弱水清
且重雕栴繡檻秋毫工天桃穉柳春苔封何人束之
生綃中真宰應與鬼神通龜臺金母遊蒼穹左攜仙
女右羽童上元侍女紀離容扶廣山外青鳥逢瑤臺
明月露氣濃飛瓊十里隨天風青琳翠水光磨銅甍
車不復驚魚龍悄然坐我緱山峰軒庭颯颯羅長松
仙山樓閣真奇蹤

冬日田居漫興八首

存六

寂寞村墟杖策過寒林落盡水微波打頭屋只三間

少負郭田無二頃多陸氏荒莊成一笑陶家蕪徑較
如何此中且住爲佳耳收拾雲情付懶窩
霜洗平皋月隱沙冷光先到野人家風聲一夜河冰
合雲葉層空塔影遮自是閏年冬較早却看細霰晚
猶斜相思只有前村夢爲訊寒梅可作花
曝背村中天宇晴欹斜得路任閒行陂塘水淺魚租
薄禾黍年豐米價平桑土綢繆乘舊屋香風迢遞爨
新杭畧嫌積草如山峙遮斷前岡野色橫
冪歷清森繞屋重竹枝低亞倚孤松半篙剩有通潮
水一桁高連隔岸峰澹景多堪留畫本村謳間亦隱
詞鋒寬鞋厚帽裘兼褊物色真宜伴老農

往事桑麻話不窮多情溪友共園翁麥苗淺壓沙頭
雪荻葉飄殘渡口風戍火依稀帆隱見板橋零落港
西東莫言比戶茅茨冷物力盈虛稼穡中

虛白窗生曖曖煙更無車馬漫喧聞冷官且免書驢
券孤帳還疑伴鶴眠庾信小園原有賦蘇公淨几豈
無緣挑鐙午夜回頭憶一別柴荆已廿年

首春二日徐藝農

士穉

招集齋中觀米南宮離騷

經墨蹟

襄陽漫士書絕倫自言夢古衣冠人授以摺紙書頓
進零紈片字希世珍見海岳名言何況手鈔離騷經完好如
故墨如新隔歲側聞秣陵客持此暫質三千緡曾傳

舊藏吳民部宜興世守秘弗陳容臺集云米元章書離騷經宜興吳民部所藏乃吳文肅公之

曾孫其未第時靳固不出示人近始裝潢成冊底緣流轉至白下是一是二誰咨詢

文通兄弟酷嗜古訂譌正謬鑒若神謂松泉廣文先生

謂松泉新安士謂錫九爭先覩快意頗諄多情乃有徐孺子首

春二日娛羣賓許我借觀非好事得之者乃姻且鄰

錦罽繡帕重什襲主人愛之逾璘珣梅花滿屋香破

鼻當窗展視光流銀喻麤照眼字入骨落筆硬弩懸

千鈞回互轉摺蓄餘勢側掠拿趯馳飛輪潤而不肥

險不怪筋藏肉裏相停勻奔如駿馬騁廣術勁似秋

鷹翔清旻首尾二千五百字字字光怪逞輪囷中有

奇氣相鬱勃上通作者楚靈均越筠萬杵認宋紙緊

薄柔滑絕纖塵惜乎紙尾失欵識此書要非贗亂真

海內奇觀信無兩容臺集謂真海內奇觀反覆諦玩豈辭頻知微干

文臨智永樗寮金剛報慈親天機腕力各有態炎宋

墨寶憶前因王著千文張即之金剛經墨本向俱見於京華茲更邁逸絕羈勒無不

當意隨屈伸一筆直下餘四面先生自許罕所臻謂自

善書者只有一筆我獨有四面語見宣和書譜石刻當年徧寰宇奚若真跡堪遵循

小王風味北海勢見鐵圍山叢談獎以重臺非雅馴宋高宗謂米字為重臺以學羊

欣也見王仲暉雪舟脞語記摩挲上下睨千古雙眼不負今年春

客冬田居詩一時屬和者甚眾今春正月十九

日為余五十初度并有和詩為壽者仍用前

韻自述八首兼酬和章

初度驚心五十過，雙丸跳去逝川波。簾飛絲雨新陰淺，是日微雨春到三旬淑景多。客臘二十日立春燕九節逢人似夢，

華鐙市罷夜如何。年年此日成逋客，爲愛芳隄柳萬窩。

浮生聚散歎搏沙，珍重團圓共抵家。竹報平安當晝

靜，萱栽襟背繞堂遮。陸士衡詩焉得忘歸草言樹背與襟承歡未許恒言老，

照鬢偏驚點雪斜。信是始衰難自掩，齒牙多豁眼多

花。

橐筆西清荷寵光，征衫猶憶舊疎狂。大明湖畔開雙

網，粵海城邊認五羊。坐我春風壺嶠遠，照人秋宇夜

河長。憐子七握量才尺，山左粵東三次典試春秋闈四與分校辛苦初心未敢

忘。

綠淨紅勻二月晴，吟鞭獨向楚天行。重湖不斷波濤

洶，疊嶂難驅魄礪平。時藉山厨烹雨茗，常聞野碓杵

霜秔。填胸巖壑三年飽，聽徹哀猿叫雁橫。

賜谷春回異命重，遙天朗日照寒松。大河南北三千

里，中嶽東西卅六峯。害馬空時攬倦眼，荒雞唱後破

禪鋒。晨昏遠有江湖夢，頭白歸來學圃農。

清勤舊德示無窮，叱犢真堪羨放翁。典去朝衫供菽

水，錄成家誠列屏風。課兒鐙照芸窗北，憶弟雲看浙

海東。痛斷傳經人化鶴，門庭措拄廿年中。

岸上遊絲水上煙，掛帆聊爾息駢闐。時有京口之行當窗山色

鈎簾坐○到枕江聲帶月眠○積累詩篇成宿債○酸辛文字戀前緣○要將醉草重刪汰○敢謂知非伯玉年○豈有清音出爨餘○多勞鴛綺惠雙魚○閒居潘岳耽歌詠○供客茅容但草蔬○醉到梅花全放後○坐來春水漸生初○蠻箋鏤管遙情結○好把詩筒日貯儲○

三月十二日閔西軒

懋庚

招集同人登康山分

賦四首

故人踐宿約招我上康山○靈氣通江海幽光出市闌○堂留崇構古草帶土花斑○尺咫登臨地平生始一攀○山以人逾重聲華一代中○宅傳姚給諫書認董思翁○康山草堂四字為董香光手書腰鼓餘三百遺囊歎屢空○猶憐數弓地峙

此郡城東

不惜一官去何辭○卅載歸琵琶酣碧酒樂府付青衣

陳寔同心跡王維早罵譏

以琵琶怒擲楊侍郎廷儀曰吾豈效王維借琵琶討官做耶

當年

七才子大半老煙扉

我亦閒居者扶筇趁此身○隔江山作案近郭水爲紳○自足塵懷豁相於逸性親○詩人今地主謂吳牧田定許往來頻

東園懷古二首

炎宋當年物力豐○名園疏築倚城東○三人可信公餘

樂

謂發運使施昌言許元判官馬遵

六郡何妨轉運功○虛閣澄時花影動

雲亭拂處酒杯空

園中舊有澄虛閣拂雲亭

如何太息登臺日○早歎荆

榛有放翁

見陸公入蜀記

每欲招攜覓遺址其如雲水剩荒阡病餘花竹心偏

賞

山谷有病起遊東園詩

卧後門冬手自煎

東坡答米元章詩

曠代風情歸劫

火千秋題詠仰名賢可知不朽惟文藻三絕空存記

一篇

歐陽文忠記蔡君謨書後人與各園并稱三絕

雨中放舟得二百五十字

炎曦蔽層雲細雨淨塵埃盈盈水到門活活潮初長
買權近尺咫呼朋得三兩仄徑披叢蘆交枝雜高莽
浮沈乳鴨羣低昂幽鳥吭汲婦時挈瓶稚子爭投網
村遠澗已澄橋通波漸廣泮水清且漣環向宮牆仰
迤邐轉城闈軒楹互開爽三重綺疏深六曲雲屏敞

倭墮垂霧鬟揚阿激清響出自澄江門

南門外

水勢彌漉

漾鹵鹽接千艘錯薪堆十丈恒業幸有托居民得所
養雨急灑孤蓬波平駛兩槳石梁雁影排官閘鱗次
往繞郭西復東乘潮下還上須臾雨乍霽天宇益高
朗南望江雲深洪流何泱泱西行聞更幽落日倦遐
賞真州古畫圖耽遊劇于痒前俯阻大壑後峻疊崇
壤藉此一葦航稍稍慰疇曩更欲馳北岡崇情凝遠
想歸來說揚子形勝指諸掌

石研齋集卷六終

孫男嶠全校

石研齋集卷七

栖烏行

江都 秦 黌 西壩

朝見栖烏飛暮見栖烏歸烏烏啞啞聲無數
書院樓名前百尺樹樹上栖烏樹底霜直耐天寒到天曙
 不上城頭啼不向井梁住千百為羣集於枯朝朝暮
 暮胡為乎滿戟久聞昇平里作賦曾集成公廬慈烏
 慈烏真善禽猶如此人何如吾聞一烏常生八九
 雛受哺於子母不孤鸚鵡差小腹下白不能反哺名
 鴉烏雛有母兮哺母飢我何恃兮空所思吁嗟乎一
 樹栖烏蔽天黑夜夜吞聲眠不得

旅雁行

雪雋雋冰峨峨夜夜半旅雁過旅雁南來一萬里
千嶂插天天拍水隨陽咽盡朝日紅從風暗度關雲
紫紫雲紅日阻且長年年辛苦投江鄉銜蘆避繳有
深意豈為區區謀稻梁賓也有時翔有次處堂燕雀
非其志應候幾同八月槎書空漫列遙天字繫帛曾
傳上林中閒來任意天西東人生羈栖隨處足何必
定到衡陽峰

十一月十九日同程檢討

元基

宮副車

增祐

夜話

次韻

不圓寒月抱虛廊漏促鐙闌話正長一卷蓼莪詩共

廢

三人同有親喪

數聲嘹唳雁低翔眼枯已斷芙蓉淚筆禿空
懸玳瑁牀那有心情事吟弄白頭相對總悲傷

題張堯峰

賓鶴

詩集後即送之令嗣清澗署中

卓哉張堯峰來自東海東手攜冰雪雲臺詩一卷磊

磊落落光怪吐霓虹博望窮源鑿幽險巨靈擘華撐

高空生花健筆鞭鸞鳳披荒斲古星羅胸維揚識面

在隔歲投我兩律音黃鐘更見古詩一首氣峭崿贈

君之友海陵宮樂儀書院詩滿壁秋林課孫句尤工

我來百讀百不厭意態天馬馳風髮

曾為舅氏椒園前輩題秋林課孫圖張之壁

別後胸陽逾一載遊徧雲臺支短筇雲臺岩壑寫不
盡變滅海蜃浮青紅胸陽感我舊遊地天池主講爪

留鴻情田丈人握手稱莫逆贈以八字聯句懸堂中

文麗思深近見淮海樂善慕道遠跋聖門丈人所贈也

二十餘年君把臂逸才揮灑有父

風更聞令子已通籍張憑不愧蒼梧翁年未五十受

祿養人生豈得云賤窮况復秦關百二雄南山紫閣

青芙蓉雕琢肝腎恣蒐討石骨何以當毫鋒江左雖

多孔李交天涯罕有原嘗逢好待春風匹馬問征路

莫辭偃蹇風雪窮三冬

正月十三日登安定門城樓

即郡城南門

層樓高處豁心顏策杖登臨指顧間繞郭依然通漕

水當窗生就隔江山星杓昨日回春律

前一日立春

鐙火今

宵照夜闌不是倚欄頻悵望年來詩興戀鄉關

早春曲四首

連宵料峭風幾日廉纖雨芳意可禁寒問花花不語

微雲翳寒旭乍陰還乍晴齒齒雪痕盡拂拂春水生

竹影搖簾波綺窗坐幽獨時聞谷鳥喧驚見池草綠

芳蘭八九盞細梅三兩枝東風纔十日莫漫怪春遲

漆榼分賦

蠻榼製各殊華樸任所欲飾或金與銀質或藤與竹

鷓夷兩耳銘瑪瑙三升玉唯茲髣以漆簡便從吾俗

覆載體俱圓釘餽盤則曲環抱四隅連正位中央獨

恍見聯珠星疑入羣嶽麓味非侯鯖成品共辛盤錄

果核各分曹旨蓄仍聚族幾人信手拈一室坐膝促

聊以供瀹茗兼復資刻燭並此入闔題詩成堪捧腹

二月四日江穎長春招集淨香園

芳期預訂尋春約無那春陰入簾幕仙源已許子驥探心朋不負季布諾瓜皮艇子竹筍輿先後招攜到水閣圓沙幾曲漲波平野雲四垂宿霧薄拂空膏雨影纖纖掠水絲禽啼恰恰東風攪入峭寒深柳未抽絲梅未萼坐久但覺人意親籟靜忽聞歌聲作閃閃映肉張高檠溶溶照鬢動春酌文通工賦兼工曲長歌短歌相歡謔掀髯高唱響遏雲棲鳥翻枝游魚躍汪倫多情虎頭癡按譜崢嶸仍綽約絲豪肉奮興沈酣鳳啖鸞吟珠錯落真覺高歌有鬼神可看逸韻穿

岩壑檻外沈沈水不波樽前沸沸春有脚一夕花間羯鼓催寒颼暗解芳心縛文通握手爲子言此中理大而物博聲音之道與心通勿以宮商爲糟粕愧予徒作書中蟬羨君真似臯上鶴絲竹由來無宿憂醉舞且詠于胥樂金屋何妨夕又今穎長攜愛姬住園中已兩日鏡顏可信老於昨白詩但恐鏡中顏今朝老于昨井中豈有投轄車郊外不聞重門柝酒闌興盡各歸去三聲漏滴春城鑰

春寒詞

瘦盡春情冷不支鞦韆紋著面怯寒颼芳期四十匆匆去大半虛檐聽雨時
當窗那見草纖纖如水空庭氣候嚴十二曲欄閒倚

遍更無人處莫鈎簾

一點芳魂夢裏尋孤山日日鎖春陰平生只有梅花癖忍我相思直到今

春光漏洩究何曾未許東風似剪能淒絕百花生日後冷煙疎雨一層層

遮斷江南幾笏峰漲波深處碧苔封天心不肯憐幽草人事空教負短筇

盼春遲爲閨春年二月鶯花尚少妍酒釀茶清香正施帶人燈後與燈前

雲母屏風密密遮徵歌鬪酒興偏賒可看玉女窗虛處飛徧檐前五出花

病骨何當料峭侵嬾看衣狗幻晴陰敝裘一領誰拋得空有旗亭貰酒心

書齋對雨

積陰闇重簾空庭坐寥閨絲絲雨脚飛遞響虛檐滴春暮花已繁飄落委垣壁所欣蘭臭幽香氣空羃歷對之懷同心佳人阻良覲物情感合離人事互喧寂願言守幽獨塵懷自煎滌

追和文信國真州署中題蘇武忠節圖元韻三

首

仗節蘇卿炳日華披圖誰不感心涯可憐纍骨踰千險暫入孤城共一家袖出忠魂偏索句

信國住署中清邊堂真州苗守以圖索題

和成淚墨已含嗟清邊堂上頻投筆愁看江雲起礮車

心跡千秋兩憤遊虜廷抗論砥中流廿年尚有生還

幸三日空教壯志休麟閣功名酬晚節

蘇武年八十餘病卒畫麒麟閣

眠圖畫觸離憂

圖爲李龍眠手畫

誰憐哭盡包胥淚曾許孤臣

托足不
干戈滿目間關路但剩真揚一旅師豈比漢家全盛
日深悲嶺海五坡時零丁洋過杼丹血正氣歌存仰
素期文藻斷歸忠義士

自古大忠自三閭至信國未有不

能爲文章者說見倪文貞公文集

方寸絕塵縑

養翮圖爲李進士

承暄作

太白作賦誇奇矯大鵬還遇希有鳥三山塊視五湖
杯逸翮摩空遊八表君是青蓮隔世身垂雲擊水無
停輪南溟北溟幾千里倏忽看徧長安春歸來獨坐
江之滸養成素鶴矜毛羽支機一片泛星槎要挽天
河作霖雨

江別駕

恂

見寄之任池州詩次韻奉酬

宦遊憶楚南與君共憂樂岳陽樓下波武陵溪邊郭
蹴躡共東西三年等行脚蒼狗幻雲煙驚鴻互寥廓
我自愧疎慵君寧甘困約破甑無戀情敗棊藏活着
年來晚桐間聲名頗不惡讞獄多平反居官無愧怍
卧理兼行吟詩句麗花萼畫戟拂清香高懷欣有託

試觀橫海鱗豈受杯水縛士元本不羈呂虔贈匪薄
背樹忘憂萱庭看繞羣鶴傳經得替人賓筵薦華酌
乳馬豈狐兔生鳳非燕雀

酬李生少白贈畫竹

李生胸中有成竹手寫篔簹日一幅凌晨盥洗清氣
來腕底森森削寒玉當其揮灑得意時風生咳唾更
題詩即今讀詩兼讀書楚水湘雲冷情話多君贈我
青琅玕風簾晝靜當歲寒墨光素壁滿生意爲我日
日報平安

南園看桂花

園在儀徵城南五壩主人潘曉窗名仁標
丁卯副車現任清河縣教諭子同年友也

筍輿纔轉南園路裂鼻馨風透襟素早知叢桂隔牆

開深羨居人傍園住舍輿入戶門徑紆花香人氣相
吸噓澄秋堂下無雜植繞屋奚啻三百株連蜷偃蹇
雲外矗碧枝叢護梢頭粟日氣高空露氣涼醞釀秋
心入秋馥早花已謝晚蕊含就中開者十二三已如
身立廣寒界直欲心同彌勒龕坐久氤氳香轉寂走
徧迴廊巖下立園中花木四時俱唯此木犀老無敵
有山招隱隔江幽主人爲置看山樓笑我三年始一
到塵心愧彼沙間鷗徙倚庭前不忍別爲說丹葩鼎
足列庭前三株丹色
者列如鼎峙相期十日後重來料得花稠香愈烈

江村看桂花仍用前韻

新城南岬
東去里許

新城東去無多路澹煙曉露凝秋素榜人指點好園

林落帆且繫扁舟住稻田如罨阡陌紆黃雲萬頃風
吹噓到門橋帶通潮水圍屋樹蟠參天株叢桂成林
高下矗初日照耀黃金粟幽芬透骨味獨濃碎玉生
膚寒而馥芭蕉葉大翠竹含清陰曲曲徑三三桃花
潭外有情水因是庵中自在龕桃花潭因是庵
皆園中堂額密柳枝藏
鳥語寂敗荷柄倚荒陂立山中萬象不勝秋古香獨
與秋心敵上下一氣清且幽捫蘿循磴登高樓底須
定握月中斧早擬相隨江上鷗白沙纔與南園別饒
眼又見秋葩列我欲誅茅近此間水國詩城策功烈

題畫爲明見上人賦

勁松千尺虬角猛古柏一株青耿耿濕紙煙雲元氣

酣撼空風雨秋堂冷參天黛色影欹斜就中點染凌
霄花古苔崛起亦豪傑赤玉掩映飛紅霞何人寫此
蒼髯叟尺幅蛟螭落君手參得天龍一指禪濤聲靜
處聞獅吼一絲不掛八垢空摩頂相向西復東他日
散花身不着披圖如對靈巖松

題桐岡舅氏遺照

憶昔舅氏行凋零多早逝惟公巋然存遠居邵伯埭
鬢也髫齡時讀書稍彊記愧無江總姿頗爲蕭勵愛
每來郡城間命必朝夕侍背誦所讀書間亦課文藝
立身與行已事事叨訓誨曾隨侍吳陵三旬同寢寐
鞠育逾所生存問及細碎時鬢入膠庠督責未嘗懈

曰吾勵吾甥藉以慰吾妹敦篤原至情期最見大義
方仰月旦評誰料梁木壞於今三十載時灑羊曇淚
披圖再拜公此貌猶壯歲捩鬚坐沈思丰神露雋異
屏風六曲圍几席有清意一生事佔畢功名僅食餼
力學窮根原易理尤精詣手示鬢一編妙蘊闡真諦
天水族氏繁毅然修譜系門才及支派炳炳昭來裔
哲人歎淪亡鮮民倍隱瘁昨歲掩萱闈慈顏悲隔世
何更誦渭陽淚下不能制

送凌學博

應曾之任貴陽

壽域作人重廉孝慎選明經充學校以此乙科無滯
材咸司木鐸振文教雲間凌子卓犖姿綺歲科名早

騰蹕性情常結古人歡璫細不與餘子較蹴躡春官
二十年看遍長安春意鬧垂雲久羈北溟鵬隱霧暫
學南山豹謁來絳帳喜相親館刊上注氏幾十年經義治事堪則
傲氣壓太華詞崑崙傾液羣言多籠罩屈宋有才憶
鄭虔風流不墜推江敷模楷信足爲人師卽今豈盡
稽古效臨歧握手重離歌舊雨情深愁一窖遙睇池
陽九子峰十年夢醒揚州覺此行努力無怠荒勿以
冷官損心貌方今

天子右文學館開四庫隆典校郎官優詔入承明朝
夕論思榮直瀑好因士龍慶彈冠陸耳山以郎官改入詞館君之同鄉也秋深
且鼓楓江櫂

題水香村墅為汪磽岩堂作四首存二

只覺花香水亦香沈沈白晝小年長煙開隔浦雕霞
透日上晶盤曉露芳空翠浮筠千萬个欹斜垂柳兩
三行此中別有蕭疎意耐與幽人細較量

何年吟社不花灣嘔盡心肝在此間遠水直疑空地
軸文瀾還欲破天慳踏歌情重潭嫌淺感舊詩成鬢
已斑壁間有主人感舊唱和詩南浦銷魂餘廿載城烏來去野雲閒

百餘年老屋日就傾圯不可復居葺而新之各
署以額并系之詩示兒恩復

靜思堂

陳蕃大掃除一室任蕪穢仲蔚掩衡門日與蒿蓬對

獨笑韓退之有屋誇兒輩娛樂竟綦槩炫燿及玉佩
豐屋蔀其家靜觀理不昧思之已爛熟心空無滯礙
達哉陶淵明吾廬吾亦愛

舊城讀書處

舊城讀書處每召對必荷上問曰汝揚州人揚州有舊城新城汝住何處奏曰臣住舊城上曰舊城多是讀書人

溫綉銘肝膈屋偏西南隅近郭門巷僻白首抱遺經
寂寞子雲宅跌宕圖史中韶光敢虛擲檢點先世文
編集重手澤先祖以下詩文集次第哀刻時督子姪課書聲朗朝夕
王言實式憑違顏不咫尺

石研齋

吾宗注老子穴山石為研五言攻長城慣以偏師戰

余家久留遺研石得巨片長徑六尺餘砥平光微絢
撫此愧前賢筆墨塵土賤物舊情愈珍摩挲日幾遍
書成感良友觀玩意不倦

梁山舟同年
爲書此額

居竹軒

杜老憩息地必種數竿竹廷珪署所居遺址不可復
居竹軒乃元成廷珪先
生居廣陵所署之額也軒成對此君佳名偶然續稚筍已排
牆清陰還覆屋好風延故人飛雨拭新沐吟成興未
孤客至多不速即此足卑栖胡爲紛棟楹

敦仁堂

鑿溝偏遇湛伐薪多逢虎人事本不齊幻境難逆觀
體仁義在元敦復占在五吾衰思假年易理貴細剖

不聞蜚廉馬勞逸固自取願爲四可吟勿作中夜舞
俯仰空庭間寸心足千古

石研齋梅花將放詩以催之

愛爾孤根着意培欣欣疎蕊破寒來早看碎玉胎中
結佇待百花頭上開透骨芳心春醞釀照人冰影月
徘徊殷勤爲向南枝祝日日巡簷按幾回

鑿江水

鑿江之水清且漣我往從之已三年北山爲屏江爲
帶波光嵐影相回旋中有奇氣鬱盤礴臯聞處處聽
鳴鶴十里香風澤畔吟一燈細雨花間酌詩筒酒琖
日無虛往往孤懷欣所託別來半載鄙吝生白沙翠

竹繁心情無端明月入我手梅花裂鼻詩句清同人以梅下寄
懷詩合書一扇見贈感此故人心尚爾瑤玖奚足酬桃李報子永
好無相忘此心有如鑿江水

福緣菴火慰主僧明見上人

四月維夏久不雨日當二十時過午福緣禪寺官河
邊寺中危樓高插天樓外廢屋久局閉無端出火自
燔煎初聞空際聲赫赫黑焰擺磨寒窗隙須臾赤龍
雙目頰礮礮直射四十尺上跳下蹕炎官驕火鞭掣
電猛且迢隅樓高周殿層峙一氣鼎沸歸燭炮丹甍
縹蓋光閃閃嘍啾啾驚摧燒宋廂爐檮榱椳交如
鼓洪爐燎髮毛金身丈六立煙燼神焦鬼爛無藏逃

是日天籟初靜默火烈具舉風轉力燄燄攸灼起蕭
邱朱光十里天南北盛德在火祝融威炎曦弛瞰閭
無色元冥不靈陽侯衰咫尺河干救不得唯餘門額
巋然尊蜜脾僧舍猶留存只此殿堂與傑閣周遭一
炬空四垣嗟哉此庵建明季

本朝賜名福國寺萬佛樓成雍正年廣殿修廊次第
置憶我首春登此樓樓中經藏堆山邱開士導我一
檢閱浩如煙海迷雙眸豈知琅函貝葉字盡昇炎火
添膏油樓橫百仞佛號萬珠裝寶飾金精浮不可嚮
邇僅八刻狂燄迅掃無纖留我聞佛體至圓徹生非
實生滅非滅浴罷真身故權應上人發愿盡浴寺中佛像甫畢偶向神邱

入火穴恒沙法界慣虛空玉鏡銖衣豈破裂裂爲告息

慈僧名息慈謂安
息于慈悲之地

勿驚哀人生萬境一浮埃法門不二何

魏哉莫向胡僧問劫灰不捨初地超十地花宮何必
非蒿萊豈少祇陀布金者行看獅座擁蜂臺

蔣編修

士銓

雪中人傳奇題辭四首

放鶴亭邊暫打包相逢杯酒漆投膠試看竭力酬恩
意羞煞人間刎頸交

并餐革子初投楚僵卧袁安早杜門風雪聲中容餓
士雄飛雌伏與誰論

柳州謾向尸蟲呪方朔書傳詈鬼文不料神靈居嶺
海也遭善罵灌將軍

萬里相邀苦死留軍門夜宴靜貌貅憐他鐵石心腸
者百鍊鋼還繞指柔

喜晤周幔亭

槃

故人久不見芳訊隔年通握手渾如夢相看各老翁
戒壇秋月白日觀海天紅珍重詩囊滿遙情付斷鴻
題故紙堆畫幅

不完偏抱缺積故轉生新豈藉相如貴幾爲溫裕陳
物情憐敝帚人事感勞薪識得此中意凋殘亦可珍

哭江松泉

昱

三首

七十匪云天憐親已九旬竟爲泉下客不念北堂人
介弟方羈宦高官豈救貧空餘家累在何以慰昏晨

鄉國蜚聲早，英姿迥出羣。所嗟終未達，却歎老猶勤。
雅韻吳才老，清詞張白雲。與君樽酒論硯筆，久思焚
沈約腰常瘦，楊雄賦不靈。無臺能避債，有子幸傳經。
半世交稱素，相逢眼倍青。良朋今逝矣，痛隕少微星。

石研齋集卷七終

孫男嶠全校

石研齋集卷八

白秋海棠四首

存二

江都 秦 黌 西巖

一點檀心玉裏成，苔煙低拂砌痕清。全憑白帝霜華
深，羞比紅粧媚體輕。卯酒已銷妃子醉，佩珠疑向漢
皋傾。綠筋翠羽相輝映，抱潔亭亭太瘦生。

爭誇八月占春芳，誰道花開此斷腸。

秋海棠一名八月鏡
春一名斷腸花

裏冰蟾遙對影，風前銀燭互生光。不須更貯黃金屋，
只合相依白石牆。小院嫩涼宜露坐，憐他黯澹伴宵
長。

招集蔣編修

士銓

金學博

兆燕

唐明府

思

居竹軒

分韻得書字

數椽資偃仰五載辭簪裾性與此君戀慕彼成公居
熱客所不到清景常相於偶來素心友脫畧禮數疎
通門三世久謂明府同譜廿載餘謂蔣金二公追維少年事塵夢
付羲車得失歎蕉鹿技能笑黔驢壯心豈未已豪氣
難盡除論文針芥合媿媿足起予恢嘲雜辨議恍如
披異書傳神在阿堵真面得匡廬座間有寫真者巖壑豈宜置
諸公匪幼輿而我久衰朽自比山中樗所幸西湖水
暫令俗慮祛學博分餉西湖白沙泉水因煮茗試之盤餐憐市遠愧此小園蔬
玲瓏竹響外圓靈月上初遐心不我棄儻來日無虛

送蔣編修

士銓

扶櫬歸江西三首

已聽諸生廢蓼莪又看朋輩賦驪歌扶將桐杖鄉心
遠戀極萱闈夜夢多信爾青瑣無長物慘隨丹旆出
城阿眼中閱盡掀天浪不怕炎江六月波
厚澤深培仰大椿知公負荷有傳薪雕談貝葉全披
目足跡塵寰半問津料得江山助奇氣定兼仙佛是
前身綵毫飛處無加點合作休明鼓吹人
那見蚍蜉大樹摧荷衣製爲戀蘭陔空教上相虛前
席久感

天心眷異才夜靜魚腸聲出匣春生鯨浪吼如雷三
年毀瘠無逾分未許閒身托草萊

書蔣編修

士銓

所作尊公適園先生行狀後

西江山川古奧闢才人奇士相接迹蔣公少小本寒
餓英毅之氣貫肝膈巨盜認僧齒未齟一肩養母髮
初憤稍長勵志在詩書十指血痕和淚積定交杵臼
慣解推救友江濤如衽席博辨常嫌六合隘寬襟但
笑滄溟窄學書學劍二十年一諾甘爲蓮幕客平反
疑獄幾百千鈞稽巨案僅晷刻東萊久推少賓誠汝
南常倚宗資畫三寸柔翰十鈞弩活人無算在肘腋
歸來半百甫成昏兒泣呱呱又遠適出入園扉七八
年燕晉之間聲赫奕不利東南利西北盡挈妻孥入
汾澤三返鄉園六十餘黃金散盡頭顱白那有辛勤
教子時天生神驥無驅策階蘭眼見掇巍科一笑髯

鬚森似戟維時已稱七十觴越歲忽驚九原隔孤兒
血淚寫遺徽四十餘紙語刺刺天壤纔知不世人藉
非哲嗣萎朝夕誦公之詩讀公傳平生樹立光史冊
活千人者子孫封蔚宗之言垂金石西江義士世豈
無嗚呼蔣公真巨擘

次張觀察

永貴

寓園詩韻四首

聞道元龍百尺樓賺來山簡習池遊閒憑水檻風軒
態探盡松髯石髮幽鴻業正酬天下望嚶鳴偏向友
生求即看三夏銷磨過屈指旌麾幾日留
高岫凌煙晨氣淨低荷拂露晚涼侵坐觀水色兼山
色不盡長吟復短吟北海樽罍原曠逸東山絲竹任

招尋况聞儉府才名甚觴咏喧傳徧藝林

聖明遭遇暫端居觀釣何須更羨魚歌席競傳新樂

府吟牀堆滿舊藏書浣花雨過光尤豔散綺霞輕態

自舒即目畫圖人露坐一庭如水碧輪虛

咀含萬象足包藏綺語難教結習忘襟濶但嫌清沼

窄情閒翻是和詩忙苦心刻燭遲宵漏信手調弓愛

早涼

園有射圃

二十五年彈指過爭如此日小年長

西湖雜詠三十首

并序存十三首

余髫齡知有西湖即欣然神往垂五十年未
一至乙未秋杪過武林又以事羈城中小住
兼旬風雨過半至湖上僅三日耳迫於城鑰

朝往暮歸別來惘惘如有所失昔晁補之年
十七賦錢塘山川風物之美著七述以謁坡
公坡公先欲有作讀之歎曰可以閣筆矣英
年異藻濟勝有具自足凌鑠一時余學不殖
且老而善病向後不審何日重來僅就所歷
率成雜詠三十首其未識真面者亦遑計山
靈笑我耶

蕩湖艇子郭門隈纔出城西眼便開萬頃明湖千嶂
合已如身入小蓬萊

喻彌陀願老能酬頑石鑄成大佛頭還有佛身三寸

小一龕曾倚十三樓

大石佛僧思淨鑄淨善畫佛畫家所稱
喻彌陀也十三間樓向在大佛寺右

酒色猩紅映碧漪，段橋橋外隱疎籬。竹枝吟徧孤山路，知是誰家住阿姨。錢維善詞阿姨近住段家橋。楊維禎詩段家橋頭猩色酒。

望湖樓上會坡仙，管領舟行隊長先。碧酒紅裙隨意適，淋漓醉墨晚尤顛。事見揮塵錄坡公有望湖樓醉書五絕。

未到西湖自有情，泉開六一耐幽烹。柏堂竹閣今何在，居士名留萬古清。相乃陳時所植僧志銓作堂其側竹閣在柏堂之南。

猿鳥清吟寄此心，移居何處更山深。通仙題壁詩山水未深猿鳥少此生猶擬別移居。先生身世清如許，那信遺棺有玉簪。

滑笏湖波拂柳條，長隄清曉路迢迢。飛虹兩岸如圖畫，幽絕風光裏六橋。

洞割紫雲垂石閣，嶺呼赤岬瀉泉源。遙看墓木皆南

向，細雨空山拜岳墳。

紫雲洞為樓霞嶺五洞之最奇者嶺舊多桃花一名赤岸嶺。

第六橋西舫課開，抽思爭向水雲隈。飛鷗浴鷺皆文藻，畫角一聲羣舫來。明時課士就舫屬文名曰舫課即今崇文書院舊址。

湖心詩社渺難留，剩有虛亭水四周。左右晶簾當檻立，恍疑人在木蘭舟。湖心社為西湖八社之一。

弁陽詞句老逾新，林麓幽疎畫意真。薄暮西泠船似蟻，香風吹送過橋人。西泠橋一名西泠又名西村互見武林舊事及齊東野語。

暗門洲外酒旗斜，不見餘杭阿姥家。柳未黃時霜已白，猶看殘菊自生花。暗門即清波門王安石詩花前若見餘杭姥為道仙人憶酒家。

西子前身面目真，濃粧澹抹儘勾人。匆匆鼓櫂肩輿過，不為西湖住十旬。

次韻酬筮秀才

立彩

湖舫招集

兩月韶光野馬飛重來湖上戀斜暉

今春再至湖上已二月小盡矣

每當

春晚芳心滿自返江南蓬鬢稀草色濃鋪煙冪歷桃花亂落雨霏微十分冶艷勾留甚怎怪遊人暮不歸

買牛歌

并序

玉井閔丈作田家賣牛歌紀客冬歲儉事今春雨暘以時二麥暢茂農人咸有豐年之望老牯稚犢繫滿碌碡邊其賣而復買可知也因作買牛歌以反其意云

去年夢牛生兩尾禾枯草盡呼庚癸人飢誰復慰牛飢爾時賣牛非得已可知天心仁愛多三春風雨陰

陽和貽我來牟徧阡陌播厥百穀敢蹉跎欲富不如畜五牯况復東郊勤穡事傾囊稱貸購烏犍犝慘物物分老穉東家買牛角六尺西家買牛腰十圍平野草深屋角卧遠浦日斜水中歸牛兮牛兮性順異諸畜足不解蹠角不觸聳肩穿鼻任苦辛悔聽人言先賤鬻君不見龔遂治渤海賣劍賣刀牛犢買又不見丞相丙少卿牛行氣喘問牛程農人無牛即無食古人重牛爲重氓但願其耳濕濕物三十留與爾牛世世子孫耕

小築看牡丹集字

小閣虛簾外花如靜女迎光浮微日麗香拂綺痕清

酒色和燈色琴聲雜鳥聲座上有鼓琴者坐來春晝寂白髮暗
中生

聽竹圖

無言倚茂竹獨立圍清陰門館澹于水雪霜生此心
可能充鳳食時復吐龍吟剩有遺經在怡然抱素襟

賈浪仙祭詩圖爲吳舍人楷作

戢戢詩篇如束筍可憐雕琢愁肝腎一歲惟憑一夕
酬區區酒脯吁可哂無本爲文現怪奇聲譽隆自昌
黎尹天衢策蹇費推敲何必今人謝不敏况我延陵
季子才隨身卷軸已連軫吟鬚撚斷夜燈青密雪灑
窗朔風緊繪圖作詩引巨觥陶然一醉無畦畛

誰莊圖爲葉詠亭天賜作

昔人所留傳居處恒足紀杜老百花莊淵明柴桑里
康成不其山周子濂溪水一邱一壑間歌詠殊難已
葉公澹蕩人家住藍田裏宅旁構數楹收盡林泉美
已成世外居託之誰氏子謂同逆旅中何分此與彼
人生無百年沾沾寧自喜陳蕃志掃除一室斯陋矣
突兀見此屋何妨千厦比圖成無主客人遠室則邇
感君達者言物我真一理

天長道中曉行簡王太守協和前輩住天長龍崗鎮
乙丑庶常歷任

宜昌
太守

離巢宿鳥漫喧呼曉色秋原澹欲無萬頃叢蘆低負

郭幾條寒澗遠歸湖遙瞻岡勢蟠龍繞極目霜天海
鶴孤笑我生涯拋未即一鞭猶自策轅軸

冬日和謝太守

啟昆

遊禪智寺用坡公韻二首

存一

紺宇閔龍象岡勢盤蜿蟬久沈隋苑夢猶帶蕪城煙
隱岫巨江表修竹倚夔顛使車慣雲合妙墨恒星懸
逸韻繼屬國離情訴謫仙留此玉局句爭傳守土賢
正眼通法藏澄心映流泉藻井空舊鉢霜月媚新娟
北寺林巒古南樓飛羽翩摩挲人往矣延眺心茫然

題程大京兆

盛修

前輩詩集後二首

信有羅含菊寧無束皙篇詩章經

乙覽諫草著丁年望極中朝重才深上相憐

謂錢塘虞山兩同年

陳情偏勇退六十已歸田

百歲春暉永迢迢逝水波心雖依北闕身已老西河

鍵戶稱桑苧裁衣早芟荷吟情終不輟興至即高歌

贈張都諫

馨

前輩

靜掃陶三徑嘉成遜五爻書中無耳食天外有心交

釀爲新涼倒詩因舊雨敲

近和墨莊總憲四律絕佳

莫言閭闔夢往事

已全拋

贈張編修

坦

同年

花氣凝虛室清音愜素襟慣吟長短句獨抱蕙蘭心

素心蘭一闕工絕

與世原無忤撫懷常自箴已涼宵漸永惆悵

擁孤衾

雨中集紫玲瓏閣送汪孝廉端光北上分得十五

咸二首

春明遠掛臘前帆才子襟期自不凡舊夢痕消吟骨瘦
新詞愁破酒懷緘是日讀孝廉花魂詞四闋共聆檐雨喧驪唱且脫
萊衣換客衫去去野梅垂路發鏤冰詩句想清劒
底緣多改舊頭銜典校藏書幾萬函久築金臺求駿
骨好憑玉瑄奏英咸馬蹄踏處冰稜厚雉尾開時柳
眼緘天末故人如問訊謂子生計只長鑱

丁酉除夕

年光荏苒歎何如老大心情逼歲除案上久無朝士籍
門前猶枉達官車只緣肺病疎尊酒更爲眼花拋

舊書最後屠蘇方酌罷熒熒雙蠟照窗虛

送程貢士贊和北上兼懷令叔魚門

倍歲隆科目

向例六年一選拔自乾隆丁卯改爲十二年

初春貢上雍親年俱未

老別淚莫沾胸馬首三千里龍樓十二重家門方鼎

盛常有曠恩逢

謂魚門以主政改授編修

建隆寺懷古

戰地捨爲寺紀年標爲名教以神道設師惟王者貞
嗟嗟李重進誼乃周室甥通死筠不守三人稱義兵
天心有歸向首亂不足平堂皇章武殿朔望禮數盈
轉瞬靖康歲道君已南征靖康元年徽宗詣殿行香重建峙城北嘉熙
二年成迨迨六百載今之寺址理宗嘉熙二年戊戌重建迄今剛六百載興廢幾經營

青燐迷遠水碧血埋層城可能仗佛力盡令忠魄生
華鯨間嚴柝夜夜龕燈明

喜晤蔣侍御

和寧

同年即席率成二首

存一

幾日春船泊盈盈綠水波愁禁風雪密老奈別離何
綺席團團坐高情巖澗多酒酣耳不熱豪氣久銷磨
春陰次張編修

坦同年韻二首

孤負芳時散誕身頽雲壓屋黯愁人九期數盡花朝
過

十三日
盡九

檢點流光一半春

芳菲無處可追尋水上煙雲夢裏心柳未翻黃梅未
白城西十里鎖湖陰

寄懷水香村野兼簡汪硯岩

堂

二首

空水渺何際幽香遞不窮芙蓉開硯北村墅倚城東
人立平橋露涼追六月風無由得銷夏三載夢常通
曲徑無纖翳虛庭受萬荷美人對清鏡君子託微波
舊芰裁衣久新筒注酒多維摩聊示疾觴詠近如何

硯岩頃
有恙

蕉衫

裁成白袷製恍坐綠天中剝比蠶絲細涼隨鹿夢通
猶嫌絺綌厚不讓芰荷工自有瀟瀟響如披雨後風
村居喜雨四首

春夏雨澤稀江潮靜不發火傘氣如焚旱甚五六月
渴隴裂日頽餓溝涸且竭惠開甘露門長鯨走天闕

入閨雨亦零霖霖纔霑垓初秋復蘊隆殘暑更突兀
忽爾殷其雷猛雨恣滂渤入境一清涼田間聞汨汨

其一

驕陽蒸圻土修車鳴淺流啞啞停復作晝夜驅爾牛
大牛牧且犂小牛料以糝不見耳濕濕但聞聲啾啾
朝食牛青草暮食牛釐蕤寢訛難馴擾來升豈優游
一雨衆車歇迴視水盈疇吁嗟萬牛力曷若天公周

其二

高秧色漸青幼秧葉多罅葉葉攪成團結角害苗稼
有物蠹其中云是蜻蜓化螟螣與蝨賊無乃此流亞
惟冀天雨鮮一飽死無赦商氣散鬱蒸涼風生秣稔

固知阿香車飛灑真無價祈甘日日心敬向田祖謝

其三

昨日雨如注今日雨如絲如注禾根透如絲禾穗滋
生氣盎芳隴笑語喧路岐向余道辛苦迴憶插秧時
兼旬未交睫四體皆累胝南阡秧半死北陌秧失期
長畝一尺禾八口敢忘疲儻今秋有獲固是上帝貽

其四

寄題戴水部

瑤

晴川曉渡圖

時水部典
試粵西

匹馬凌晨來旌旗蔽遠水岷漢此合波滔滔流不止
黃鵠何蜿蜒大別培塿耳山以禹跡傳閣向晴川倚
使者炳文星燦若朝霞起投鞭喚渡過綵鷁層城指

熹微初日紅照耀萬峰紫珊網開且宏玉尺美無比
平生富篇什跌宕在圖史世德振箕裘豈徒誇桃李
江水清且漣臣心矢如此驛路已三千
天威還尺咫莫懷將母心詵詵靡有已皇華周咨詢
歌詠從此始

結交青松枝圖四首

風雨飛墨龍染此青松障爲愛松色奇更聽松聲壯
松受石氣生石怪松亦怪所以石交人對之心逾快
或如麈尾駢或如幽人筆誰謂叟支離相投膠與漆
松花紛易落松脂淪入地百尺礪柯身孤情入遥翠
邗江秋漲行

邗溝界在江淮中亘三百里南北通湖黃異漲自西
下往往奔騰東復東今年水決豫州境下游洪澤當
其衝河臣預籌疏濬策盡開閘壩宣川壅海口迢遞
不及洩江潮倒注無能容遂使湖河無畔岸汪洋一
片搖虛空秦郵東去盡沮洳邠埭南下驚潰漉蕪城
環逼流益急砰磕蕩滴聲洶洶波有消長勢不定人
無愚智疑且恟嗚呼春夏雨澤少高原渴土生蒿蓬
即茲下澤復淹沒窮黎何以供殮饗

天子仁聖大吏慈陳奏定有恩膏重但今閏歲秋已
九二麥不種月初冬諺云閏年不種十月麥安得即日水歸壑縱橫
其畝仍舊蹤俾降嘉種命率育天心庶慰此三農

石研齋集卷九
送張同年模歸京師即次留別元韻

相逢輒相別離思倍悽然黽勉飢驅日崢嶸歲暮天
吟情歸雪鬢孤艇老寒煙憶得同年日君年最少年

戊戌除夕

堪笑勞生未有涯崢嶸暮景感年華酒治宿疾貪杯

酌近因臂痛服藥酒

耳爲新聾任語譁底事書空徒咄咄但餘

口業尚此些

白詩些些口業尚誇詩

吟成便欲慵騰睡老怯燈花炫

眼花

石研齋集卷八終

孫男尊全校

石研齋集卷九

述老二十韻

江都 秦 黌 西巖

吾身甚矣衰右體乃更弱憶我兩年前第二右齒落
其一遂孤懸動搖無倚着衆短此獨長食味怯咀嚼
兩耳詎佯聾左聰右不若恨無挑耳圖塵根施六鑿
去年白沙歸右臂痛大作醫師內外治膏膠雜酒藥
彼非九折肱我寧三解縛鬢絲日堆霜眼花誰刮膜
拜跪足不靈欲前勢轉却跬步亦蹒跚歡場失踴躍
羨爾首春中華輿滿城郭衝途疾於飛入戶氣如灼
絲竹競繁聲樗蒲傾巨橐豪筵樂未央籠燈迫嚴柝

而我多病軀無能事酬酢惆悵鏡中顏今更老于昨
靜觀意有餘默坐心不惡爲詩謝同人蓬蒿甘寂寞

張上舍

賓鶴

屬和疊前韻

攻詩如攻城勝負分強弱君家旗鼓嚴一見已膽落
壁壘何清森運籌獨沈着左馳而右突任意肆吞嚼
憐子曹檜邦大楚定不若既無偏師攻那有五丁鑿
三舍退未休再鼓氣難作令人不可試譬若无妄藥
受降峙堅城欵關甘面縛驚看一戰霸頓開雙眼膜
此真怯大敵非徒云小却勁旅猝相逢驚怖翻歡躍
憶昔鑿江中握手聚東郭把酒碧醺醪剪燈紅燿灼
高論瀉秋濤佳篇傾錦橐促坐夜沈沈霜風入鈴柝

一別去雍梁五年疎獻酢豈料詩筆健老境更非昨
珍此瓜李投足破風雨惡張之素壁間春心不索寞

積雨無聊適金學博

兆燕

潘孝廉

純鉦

和詩同日

至三疊前韻奉答

痴雲繞屋頽濕草侵階弱不斷雨廉纖無休簷滴落
紛紛梅蕊凋芳心忽無着閒緝讀過書揩頤細吟嚼
掃垢契真如焚香耽寂若舊雨來新詩人工疑天鑿
何期一日間飽讀兩傑作如渴沃神漿如醉餌醒藥
推排有波瀾跳盪無羈縛轉覺積陰中清光開天膜
險韻互爭奇俗諦盡屏却頓欲攘臂呼還思拔劍躍
恨不來戶庭或共踏郊郭詩徑未荒蕪吟情此炎灼

傾瀉漉枯腸羞澀搜儉橐入夜雨更喧聲聲間遙析
瘦羊張初筵良會阻交酢前一日學博招飲未赴欲訪孝廉船孝廉昨有湖上
游風雨非一昨安得陽烏升盡掃陰霾惡握手登春
臺交歡慰落寞

和述老詩者既多且佳已三疊酬之矣頃承張

都諫前輩馨太史同年坦屬和意不自持復

四疊以答

文陣遇雄師衆強攻一弱曲江峙二難騷壇更擺落
初讀太史詩生氣難捉着令兄思益研字字耐含嚼
機雲洛下齊軾轍眉山若泉源本潔清人力復疏鑿
深心無淺吟佳篇不苟作堪爲饋貧糧足抵却老藥

諦即俗即真心無解無縛散花不着身祛妄如退膜

維摩經結習盡者花不着身

泉石自娛將絲竹未拋却繁絃宿鳥驚高

唱潛魚躍探花過南橋買棹出北郭俯鑑波沈沈仰
窺月灼灼兩公侍從臣廿載持簪橐玉署倚高槐金
門聽暮柝王翰叨比鄰張羽常飲酢物態已屢遷人
事歎非昨君家誠競爽我體笑羸惡積習那能忘聯
吟破寂寞

同年坦再疊前韻見贈並追羨十九日泛舟之

樂因叙前遊兼訂後約五疊奉酬

漾碧春水深翻黃柳絲弱初度逢宴邱燕九又名宴邱節隔夕

燈已落際曉出城南買舟先繫着浮靄望中迷軟風

牙底嚼逕來金粟庵禮佛心肅若問卜老息慈語真
天未鑿自坐幽篁叢不聞衆籟作即此離垢園便是
消愁藥吟朋次第來那受菩薩縛搖空入中流金篋
祛眼膜年年湖上游風光詎忘却維茲春爛漫遂覺
意騰躍論詩擬陶謝講易推管郭有興且鬪題無疑
何龜灼且復赭醉顏莫漫愁空橐靜聞古寺鍾遠隔
重門析却憐一葦航未邀衆賓醉何妨再而三寧必
今非昨桃李花已繁春夢定不惡排日竚嘉招良遊
毋落寞

汪比部棟唐明府思吳上舍均先後見和前作

六疊奉答

蒂固根必深幹強枝不弱諸公何袞袞珠玉從天落
造篇無雷同覓句有根着時復露奇怪真堪受齧嚼
媲美蘇黃間壓倒元白若延陵有詩癖日日事劊鑿
初披和韻箋再讀懷古作吳和詩外又鈔示揚州懷古十斷句汪倫多情歌
唐衢苦言藥答明府詩意迥如皋鶴鳴那比春蠶縛一一抽
蕉心層層刮竹膜各自張一軍而我徒九却且喜詩
蟬聯足令心雀躍麗藻愧曹王鑒賞慚許郭四壁何
陸離五色互輝灼來詩盡張之壁如珍列瑚璉如富充囊橐相
期一夕歡聽徹深更析潑墨更聯吟傾尊交獻酢縱
覽和來詩話言儼如昨何必假絲竹陶寫已不惡六
疊勉繼聲情寧甘寂寞

二月十六日吳迂客魯招集古愚軒分賦二首

踏遍郊西赴雅招是日展雙墩墓兼過惠照竹林兩寺緇塵吹入鬢刁騷日

增老狀豪情在恰半春光花氣饒七字清詩慰飢渴

迂客近作飢字韻綠萼梅詩百年手澤重瓊瑤座中出示家藏霜毫走墨鷺溪絹

暢好吟朋解寂寥

愛君標格久離塵十載冬郎侍櫛巾架上書多兼課

子樽中酒滿慣留賓迂偏稱客誰為主古不嫌愚性

自真南海名香滇海茗沁人心骨總清醇

春帆課兒作

幾幅輕帆綠水隈船如天上坐春來飽張料峭風聲
去低趁廉纖雨脚迴畫裏有山和日落鏡中遠勢倚

雲開故人無恙歸何晚爲倩番番花信催

酬唐明府思贈滇中銅釧

地產五金不愛寶赤銅爲物最精好見漢書若耶碣石渺

無聞童奴遠徙滇南道銅之精爲童奴見元中記滇南開厥採官銅草

黃水綠深山中千夫萬夫日鑿鑿洪鑪一炬天宇紅

就中鑰鈿豈易識真者生自波斯國鑰鈿即風磨銅乃自然銅之精也方

圓不定銅坑中自然之銅往往得不經鑛鍛雜石沙

星星閃出光如霞約腕爲釧止臂痛覓之不獲徒咨

嗟山川萬里忘契濶一枝分我金條脫爲言纏臂多

歲年眼見捶成手親抹羊權珍重綠華貽定有銅神

陰護持從今使臂復使指願書千紙酬相思

唐觀察

床衡

招集牡丹花下分賦

暄涼春氣陰晴宇醞釀牡丹花競吐花雖無言如有
意早待歸人來作主主人老屋屋如海一去滇南二
十載漫道劉郎去後栽却非白傅春城買香山有買花詩爲報
花開張綺筵元已初過穀雨前淺紅淡白好顏色疎
簾密幄籠春煙百朵深叢共一本洪纖高下芳心滿
譬若族大支屬繁繞膝孫曾相近遠觀察孫曾輩甚夥是日俱攜抱花前主
人愛此歡心顏白髮驚從萬里還對花擊鉢紅燈照
花應笑人心膽頑我亦天南蹶躡回十年塵夢付樽
罍但願年年花下醉不知襟抱爲誰開

題汪孝廉

端光

遊草後二首

生花筆走浣花箋寫盡新春晚夏天絕妙詞如姜白石
再來人是李青蓮

慈母占烏望眼餘鏡邊温嶠已還家袖中一卷南遊
草抵得忘憂蠲忿花

己亥三月二十七日惠照寺誦茗上人招集分

賦并序

積雨不止是日忽霽吟侶九人先後赴招期
汪劔潭孝廉不至用壁間聯句以無所思心
得大自在力十字爲韻拈得在字按在字說
文祇有去聲廣韻分昨宰昨代二切爲上去
二聲今自在之在從上聲

春晚麗新晴有約期不改麥田宿雨滋遠水溪橋滙
蒼然平楚間花宮峙爽塏古傳木蘭院王播受欺給
此寺是耶非千年闕疑殆駐錫乃詩人佛國生光彩
睥睨紺宇新香界恣幽採老樹叢寄生新篁盡抽筴
井冽汲山泉茶香破玉蕾盤蔬放清饒努力餐加倍
欲招故人魂爲歎詩鬼餒林刺史子工詩
早亡柩停寺中物論何時齊昔
夢幾人在憐子本吾宗支派分淮海相逢憶河干一
別三十載三十年前晤上人于河干蕭寺
時共五人今存者吾兩人耳耽茲佛廬清坐愛春
光駘齋厨果療飢鉢飯不嫌每

喜晤吳廣文同年

本錫

并書詩集後三首

與子同年三十年相交更在十年前孤闈自向蠶叢

闢絕境都從蟻曲穿幾許豪情依碧落無端幽意托
青氊歸來一笑裝何儉只有盈囊白雪篇

矯如天馬獨凌空幾卷高吟老益工奇氣直規李太

白雄心欲壓楚重瞳

集中項王廟太白樓
詩最夥因舉以奉况

圖成海國仙山外

新繪海水
移情圖家近桃花暖塢中庾信臨江今有宅可憐清
興與誰同

說到交遊淚欲霑升沈前夢幾掀髯項斯久已無人
說畢萬何曾應往占謂花江
蘭汀孤焰深更寒命酒空庭晴

日靜烘簾歡情未盡離情續歎我頻年老病兼

題吳廣文海水移情圖

天風浩浩兮莽蒼海水汨汨兮滉漾獨坐一石空萬

象雲爲帆兮煙爲槳既非辭組之仲連又非浮槎之
張騫胡乃狎此滄溟趣積氣虛壑相迴旋知君才富
富如海一坐鱸堂三十載頭白歸來謝世氛爲訪瓊
田若有待神山隱約水仙俱縹緲煙波入畫圖欲往
從君苦無路憐予日日守菰蒲

三月九日偕同人由金粟庵遊九峯園遂至寶
筏寺聽竹溪和尚說戒飯罷北過香阜寺前
渡河登上方寺觀三絕碑品第一泉恭謁天

寧寺

行宮至大觀堂瞻仰

御書樓際晚入斗姥宮小酌踏月而返得詩五首

風暄春日暮雨落桃花殘繁紅被廣術空翠浮幽欄
夙約踐精舍素心聯古歡招攜理晨策回首迷荒巖
小虹遞古渡小虹古渡皆橋名輕吹起微瀾芳園邀

睿賞峯石何巒岼森然列有九幻入琉璃盤遙池圍
碧水泠泠百頃寒滄浪興自遠濠濮思無端俯仰肆
凌緬物外澄靜觀其一

觀物苦迷川禪悅心所寄遠出化人城徑造馱經寺
誰來白眼僧軀瘦囊多智獅座迫諸天蜂臺擁初地
闍黎律既嚴迦陀語以次君子戒有三儒釋理無異
同歸不二門共證第一義衆香鉢已飛離塵服斯被
飯猿竈下馴經鴿佛肩避清供俱伊蒲悠然雲霞思

其二

雲蒸與霞蔚鬱然圍五臺香阜寺土人名五臺山上方更西峙蜀岡

勢崔魏回憶匝月前

萬乘自天來士民伏岸側歡呼聲若雷今茲循

蹕路喚渡綺宇開菜花間麥穗綠水縈蒼苔斷碑捫

三絕清泉遞一杯主僧延客眺勝蹟幾徘徊為誦

御製詩五字萬象該增妍及草木望氣何佳哉其三

佳氣滿維揚三日停

鑾輅

行殿倚拱宸天寧門名萬靈畫呵護堂皇啟大觀典籍分四

庫高樓環壁水長廊燦詩句御製花詩蓋刻廊間十字敞雕甍濃

綠暗晴霧巖瀨互低昂麗目非一趣杉檜幾千年摩

挲晉代樹相傳謝傅居亦云柳毅住佛國傍

宸居歷朝荷榮遇康熙朝即為御蹕之所恍忽閭闔門仙音下韶濩

其四

仙苑既頻造飛磴亦屢攀城南至城北永晝巖壑間

日落雲際樹月出煙外山眷茲禮斗室棲靜慮亦閒

紅欄低碧竹坐聽波潺湲筍輿衝塵去笙歌拂水還

靈鷲響清梵宿鳥語關關乘興理杯酌藉以赭衰顏

搏沙憐聚散瞥眼緣或慳歸來入清夢常繞綠楊灣

其五

即席酬程庶常沈

卅年詩句細評論白首相逢共此樽情篤尚嫌文字
淺杯深不藉管絃繁花開花落渾如夢春雨春風早
杜門却歎劉楨偏善病無能叱馭愧王尊

答來詩末
二句意

施侍御

學濂

惠澤紬二端并十疊道古堂無米

詩韻二首見贈次韻却寄

開緘雖誦句驚人珍重華篇足饋貧况復雙雙裁細
綺相將六六遠文鱗多情不忘蓬山舊隔歲猶看墨
瀋新謂與鄭虔詩十疊襟期偏共冷官親

謂金棕
亭學博

敢云泉石性幽耽老去眠情上箔蠶久似邴原嚴酒
戒愛同子厚聽農談走呼牛馬何妨署隱號蜘蛛亦
所甘多病年來成底事閉門覓句我猶堪

述懷兼示兒

恩復

六疊前韻

襟裾牛馬古羞論俗慮憑澆酒一樽儘有幽廬耐吟
弄可堪世態太喧繁彌天學業歸經訓擲地文章出
華門却笑少陵嗤小技漫云于道未為尊

呂原明雜記云
少陵詩文章一

小技于道未為尊文者載道之器安
得謂之小技顧所用者為何如耳

賀江成嘉

德量

榜眼及第

吾郡康雍朝卅載三榜眼

甲戌江都顧諱圖河庚辰寶應
李諱愈甲辰高郵王諱安國

前後

又四人探花與殿撰

癸未寶應王諱式丹癸丑儀徵陳諱俊兩狀元
丙戌高郵賈諱國維己丑泰州繆諱沅兩探花

一甲踐清班諸公何衮衮今逾四十年無人膺此選
卓哉文通子木天作冠冕奚啻里閭光足發多士憤
猶讓一頭地人意或未滿然以少足珍豈因屈見短

念子伯與父刻意窮墳典殉者悲宿草謂令伯松泉存者位
通顯要其困場屋平生俱偃蹇羨子一奮飛立造蓬
萊館大椿更進階五馬已連軫門楹標除目疊疊如
抽筍老福慶重闡穀乃俾爾戩吾知報潛德蔚宗言
有準積厚光自流謙益滿乃損玉署凜清嚴慎旃子
其勉

石研齋夏日書事十二首

拓得數弓地居然三徑深迴欄紅曲曲密葉碧沈沈
靜掠穿簾燕喧聞繞樹禽窗虛透淺暑小立足幽尋
眼不因人熱襟常對客涼草抽如髮短日永似年長
閒倚支離杖高眠曲彙牀夢中多得句覺後已全忘

兀坐書城裏閒來信手拈狂吟恒拍案撥悶幾掀髯
敢謂吞爻夢寧垂閉肆簾只憑青史在爲我炳著占
幾日敷甘雨枯禾慶更生天心憐赤子人事重躬耕
未卜倉箱滿先欣溝澮盈十年歸隴畔辛苦識農情
簷雨聲初斷鑪香冷欲空浮生蝴蝶夢世事馬牛風
久信貧非病其如老似翁敢云憎白髮亦自怯青銅
築就琅玕館栽來的皜蓮此君真可共彼美亦爭妍
硯北抽絲繭天南跼水鳶知兼足不足聊以度衰年

新署知足知
不足軒額

學退如飛鷁言繁似坐魚精心讐搨帖厚價購鈔書
雜誦誇臣朔清才賦子虛辛勤課兒輩慎勿廢居諸

遺簪甘自棄敝帚向誰陳佳句偏懷舊官書盡聚珍
常因天外雁獲剖水中鱗都中門下士寄詩見懷并惠聚珍版書又報崇宣侶
臚傳第二人

禮寧拘我輩狂自屬吾儕送到琴材古有受業者賒來

畫幃佳不耽司業酒已斷太常齋閒有心朋至詩成

藉字牌

自笑肱難折常嫌足不靈左腿常覺酸痛養疴親藥裏破睡錄

茶經目訝看花霧交成欲旦星唯餘金石永珍重古

碑銘

鑿鑿幾拳石移來自白沙真州友人載宣石見贈相看何磊落小疊

已崢嶸却重故人意偏宜處士家幽懷良有託爲護

隔年花新種牡丹數本以石嵌之

趣向閒中永心從象外棲有交書勿絕無物論何齊

棋局誰嘲敗詩名不厭低頽然老居士盡日畫堂西

七月初六日夜苦熱不寐

中伏已旬餘立秋遲兩日初八日立秋驕陽甫西沈火雲仍

突兀向夕風忽停終夜暑彌鬱帷帳裏紈裘衽席膩

膠漆反側身不安動搖扇不迭欲招睡魔來苦被炎

官遏起視天蘊隆沈沈萬籟滅兀坐困不支引避計

無出長日歎小年短漏幾匝月亦知旭日升火繖更

酷烈其如夜氣蒸熱釜倍凝結安得落梧風秋心換

素節一片玉壺冰終日抱冰雪誰云性無常寒極又

思執就放翁詩
意反之

示兒思復兼送諸同學省試

人生功名不早達譬若貧女未嫁守閨闈人生少小
不勤學譬若百蟲蟠蟄無知覺當春萬彙抽萌芽根
之沃者光自華要看有筠如竹箭豈第不扶等蓬麻
志士讀書貴鎔鑄爲富豈以多文誇慧心深識爛巖
電毫釐之失千里差刮磨洗伐匪朝夕那容美玉留
微瑕莫以得失諉之命披揀未盡金中沙朗鏡一照
落葉掃豈真迷目五色遮吁嗟乎前程浩浩如漆黑
功力不容寬晷刻修名未立今仍昨試看光陰蛇赴
壑

夢讀圖

讀書誠樂事夢寐總難忘柳拂塘陰曉荷鋪露氣涼
吟鬚森似戟竹屋小于航自有丹山路清聲萬里長
曲尺軒爲管鑿白作

吾廬逆旅同得尺則據尺伸屈亦何常外曲原內直

莊子我內直而外曲內直者與
天爲徒外曲者與人爲徒也况茲折以方曲而有直式移牀

就高眠

白詩移牀
曲尺眠

迴流眇江色

王周詩却見
長江曲尺流

如入渾儀中恍

居韋杜側枉尺非所爲審曲定有得應加丁字欄奚
啻玉界畫對月映斜鈎看山留缺壁人才可默量大
直非假飾軒開緬匠心從繩卜安宅

石研齋集卷九終

孫男嶠嶠全校

